

靜

志

居

詩

話

靜志居詩話卷六

秀水朱竹垞先生著

扶荔山房編輯

許繼字士脩寧海人洪武中台州儒學訓導有觀

樂生集

士脩自號觀樂生賦詩九章其言曰天地間物物可樂也况垂象成形之大者乎塵土憂勞亦人自爲耳靜以觀之取其寓於目而樂於心者爲觀樂九詠九者何青天也白雲也初日也霽月也丹霞也滄海也遠山也澄淵也古書也侯城爲之作傳其卒也又爲之作銘稱爲

篤志尙德之友而曰君言必出乎正動必由乎禮趨舍
取子咸則乎古之君子而無所苟其精思學力以求道
德性命之蘊汲汲若或失之而有得乎心沛然以樂不
以貧賤患難惑其志予取友二十年所交海內知名之
士甚衆考其所存莫有類吾士修者其心悅而推服之
若是士修夜坐詩云不意片楮間乃見古人心自道詩
云聖言久彌宣有求卽可得皆守道之言也

郭鈺字景南營國第八子贈定襄伯

景南最爲方正學所器有對雨寄正學詩云小齋頗幽

僻窗扉亦豐敞新槐簷上綠細草階下長寂無人事喧
但愛雨聲響緬思同心人吟懷共清賞亦復具韋左司
體

唐之淳字愚士以字行紹興山陰人應奉肅之子

建文初用薦爲翰林侍讀有萍居橐

萍居亦正學好友正學稱其孝行謂君父應奉謫死臨
濠君辛勤跋履奉喪歸塋追求父平生題詠荒郵敗壁
高崖斷石之間纂錄收拾如獲金璧時時伏讀淒切動
人然則應奉所存丹崖集皆出其子所緝也建文三年

命舉文學之士撰鑑戒錄正學實薦之召至卽拜侍讀
同事纂修是年閏月卽病死元津街官舍蓋正學之友
若夷仲士修仲縉皆先正學而亡故皆不及於黨禍也
萍居詩流傳特寡聞松陵一故家有鈔本亟往購之已
轉付新安質庫不可得矣

袁凱字景文松江華亭人洪武中徵拜御史以病
免歸有在野集

媯蜚子斥楊鐵崖爲文妖惟詩亦然雖才情橫逸而習
氣太深沿其派者高則溫岐李賀下或雜以宋詞元曲

孟載子高皆所不免獨海叟純以清空之調行之洵不
易得然合諸體觀之則不及季迪伯溫尙遠何仲默推
爲國初之冠似非篤論也世傳海叟賦楊白花有讒之
者曰欲種楊樹於深宮將蒔花萼於何地海叟聞之遂
佯狂騎烏犍杖木笛行九峰三泖間徵典郡校不起對
使者歌月兒高一曲是又河西傭補鍋匠之亞矣海叟
居松江府治東門外崇禎末單麻城恂卽其址構白燕
菴李舍人待問書聯於柱云春風燕子依然入大海鰻
魚不可尋相傳孝陵有言東海走却大鰻魚何處尋得

言二八天言言 卷二
三
爲海叟而發也恂字狷菴庚辰進士以詩文名待問字
存我癸未進士精書法死於難

漏瑜字叔瑜一字大美別號越南會稽人革除間
河南道監察御史有石軒集

侍御潛迹江湖締交耆舊宣德中在烏墩爲九老之會
時趙巖伯高年九十一吳煥汝文年九十趙岐伯通年
八十九孫孟吉兆禎唐其諫年八十五水宗達朝宗年
八十二叔瑜與壺敏中行錢郁耀宇年皆八十餘時人
有詩紀其事云景迥桑榆盡日閒更邀同志效香山尋

常樽酒頻酬勸適意林泉任往還心遠自忘塵世事年
來不鎖利名關莫言九老非前比養得天和總一般流
傳以爲佳話巖宋安定郡王後洪武中官儀鑾司序班
岐安康郡王後孟吉革除間太常博士其諒革除間以
文史院出署天長丞郁湖廣石門知縣巖煥孟吉敏皆
烏墩人岐青鎮人宗達吳江人其諒鳳陽人郁臨安人
敏好乘舟玩水時號浮瀾先生著有竹松集煥有怡安
集烏墩一曰烏皮亦曰烏鎮又曰烏陀青鎮卽青墩也
萬歷中扶溝何出光撰蘭臺法鑒錄凡任御史者書其

名系獨不載叔瑜殆以革除間任舊籍去之故爾

魏澤字彥恩溧水人刑部尙書靖難後謫寧海典

史

附錄愚山云彥恩錄方博士家時藏其幼子以故方氏不絕謝方石詩所謂孫枝一葉是君恩者是也

袁敬所不知其名

敬所靖難後流寓常山之松嶺酒酣書五柳圖詩云藜杖芒屨白布裘山中甲子自春秋呼兒點檢門前柳莫遣飛花過石頭擲筆悲吟繼以濺淚有江右布商見之

曰此吾鄉某編修何爲在此敬所趨掩其口不顧而去
姚廣孝長洲人幼名天禧旣爲僧名道衍字斯道
洪武中以高僧應選侍燕邸永樂初論靖難功
爲僧錄左善世加太子少師復姓賜今名卒贈
榮國公諡恭靖有逃虛子集

少師與十高僧同徵當時孝陵知人則哲何不移來復
之誅誅之攷前代桑門得預軍謀者若佛圖澄道安鳩
摩羅什支曇猛竺朗皆非盛世之事少師獨早著才稱
晚參帷幄文與北郭十友之林武居靖難諸臣之首咄

咄怪事觀其入燕兩謁劉太保墓賦詩云良驥色同羣
至人迹混俗知己苟不遇終世不怨讎偉哉藏春公簞
瓢樂巖谷一朝風雲會君臣自心腹大業計已成勛名
照簡牘身退卽長往川流去無復佳城百年後何人敢
樵牧斯人不可作再拜還一哭蓋早以藏春子自况矣

解縉字大紳吉水人洪武戊辰進士試中書庶吉
士尋除御史謫河州衛吏旋待詔翰林永樂初
進侍讀學士直文淵閣預機務逾年進翰林學
士出爲廣西參議改交趾入奏事會太宗北征

見東宮辭去爲高煦所譖徵下獄命獄吏沃以

燒酒薶雪中死有春雨齋集

明初詩傳者多失真如楊廉夫題鐘山作此吾鄉朱山人純詩也解學士題虎顧衆彪圖則又廉夫之詩也乃說詩者謂太宗幾欲廢嫡見詩而止傳會之言殊堪發笑學士詩敏捷不大推敲其言曰寧爲有瑕玉莫作無瑕石其立意固如是矣然就近體而論如細雨乍過西掖樹薰風遙聽上林鶯青山拍拍風沙滿紅葉蕭蕭浦樹稀三千歲後桃花老二十四橋秋水通天連銅柱蠻

烟黑地接珠厓海氣黃粵女豔妝爭艸髮猺人村鼓共
鳴銅青山遠道遙相送畫舫中流獨自歸千家竹屋臨
沙背萬斛江船下石頭未嘗不符作者亦何至叫躑躅
突若世所傳詠物諸詩衆惡皆歸皆由敏捷召之乃知
騷憂以迅驟爲主鷹隼以輕疾爲妙張純之言大非篤

論

楊士奇名寓以字行泰和人建文時以辟召入翰
林永樂初改編修入直文淵閣累官少師華蓋
殿大學士贈太師諡文貞有沙羨石臺東里諸

集

東里優游按衍諸體皆蘊藉可觀其自序云古之善詩者粹然一出於正用之鄉閭邦國皆有裨於世道夫詩志之所發也三代公卿大夫下至閭門女子皆有作以言其志而其言可傳余早未聞道既溺於俗好又往往不得已而應人之求卽其志之所存者無幾也亦可謂能自訟矣

楊榮初名子榮字勉仁建安人建文庚辰進士除翰林編修靖難後入直內閣更今名累官工部

尙書謹身殿大學士加少師卒贈太師諡文敏
有雲山小橐靜軒退思等集

東楊詩頗溫麗上擬西楊不及下視南楊有餘

楊溥字宏濟石首人建文庚辰進士除翰林編修
靖難後轉太子洗馬宣德初以太常卿兼學士
直內閣歷官少保武英殿大學士諡文定有集
三楊位業並稱南楊詩名獨不振

胡廣字光大廬陵人建文庚辰賜進士第一更名
靖除翰林修撰靖難後直內閣復名廣累官文

淵閣大學士卒贈少師禮部尙書諡文穆有冕
菴扈從集

楊東里楊白花云楊白花逐風起含霜弄雪太輕盈蕩
日搖春無定止樓中佳人雙翠鬢坐見紛紛渡江水天
長水闊花渺茫一曲悲歌思千里胡光大楊白花云楊
白花渡江竟不還非汝故來急恐落泥塗間春光憔悴
如花顏相思不見空長歎浮雲流水何漫漫安得隨風
返高樹仍結柔條莫飛去世傳袁景文賦此題蓋緣讓
皇遜國而作然則兩公詩亦不無故主之思矣然邪否

邪詆光大者謂金川門之變約周紀善同死旣而人偵之尙在餵豕果爾則可鄙已甚觀集中過顏平原文信國余青陽祠輒有弔古之作其題宋思陵所書洛神賦云辭夜焚香閱舊書洛神下筆意何如可憐不寫平戎策千古中興恨有餘汴水園林迹已荒南來宮館燕錢塘卧薪有志圖恢復好寫招魂辭岳王其辭悽惋不類牧豬奴東里尤與相契胡語楊曰吾兩人實兄弟後死則銘及胡沒後楊夜夢偕胡泛舟自快關至郡城下聯句胡云金螺瀟灑對芙蓉楊云鸞渚魚舟窈窕通遠樹

白雲秋色淨胡云故人清興酒船同河山夢冷謳吟後
楊覺而續之云生死交深感慨中猶想勝緣如夙昔並
騎黃鶴過江東永嘉謝庭循爲作圖相傳東里亦與紀
善誓同死後語其子曰吾若偕亡誰與尊公作傳豈兩
人品行相近故友誼諄諄若是邪

金幼孜初名善以字行新淦人建文己卯舉人授
戶科給事中靖難後改翰林檢討歷右諭德掌
翰林學士陞文淵閣大學士歷官太子少保禮
部尙書兼武英殿大學士卒贈少保諡文靖有

北征集

文靖扈駕北征大漠窮沙靡不身歷故其詩時露悲壯之音

夏原吉字維喆湘陰人以鄉薦游太學選授戶部主事建文初擢戶部右侍郎靖難後進尙書遷視江南水利歸掌行在吏禮兵部都察院事仁宗卽位復戶部尙書加少保兼太子少傅宣德五年卒贈太師諡忠靖有集

長陵靖難而後瑞應獨多黃河清甘露降嘉禾生醴泉

出卿雲見野蠶成繭麒麟騶虞青鸞青獅白雉白燕白
鹿白象元兔元犀史不一書甚矣天之難諶也當時詞
臣爭獻賦頌夏公長律會萃而詳書之具見閎麗其辭
云聖主膺乾運垂衣馭八區道隆堯舜比功茂禹湯俱
蕩蕩三邊肅熙熙兆姓娛普天歌至治率土發靈儲爰
有諸蕃國能忘萬里塗隨槎超瀚漫獻瑞効勤渠渺渺
來中夏惓惓覲帝居麒麟呈玉陛獅子貢金鋪紫象靈
山種驂騑渥水駒駝雞同鸞鷲文豹擬騶虞福祿身紆
錦靈羊尾載車霜姿猴更異長角獸尤殊綵檻奇音鳥

雕籠雪色烏元龜三尾曳山鳳五花敷日上龍墀麗風
迴貝闕迂禮官躬典設蕃使肅奔趨仙掌開丹辰祥烟
散紫衢重瞳欣一顧百辟震三呼茲豈尋常致端由治
化孚旣將昭帝德尤足壯神都炎漢何能擬姬周莫竝
驅拜瞻嗟慶幸稱贊媿荒疎惟願皇風洽仍祈化日舒
鴻圖千載固聖壽萬年餘讀之如覽西周王會之圖披
北魏南齊符瑞之志亦可云詩史矣特魚虞模並用殆
猶遵洪武正韻乎

黃淮字宗豫永嘉人洪武丁丑進士除中書舍人

陞翰林編修歷侍讀左庶子進右春坊大學士
輔東宮繫詔獄十年洪熙初入內閣兼武英殿
大學士累官少保戶部尙書卒諡文簡有介菴
省愆歸田等集

長陵北征畱文簡輔皇太孫漢庶人中以蜚語繫詔獄
十年遂以省愆名集集中詩所云寶劔薶豐城爛斑土
花碧又云十年頓足圍扉間時向牆頭看柳色是也因
是受知宣廟特深當其人朝賜游西苑肩輿登萬歲山
宴太液池親灑宸翰贈行有云朝旭光升紫殿清相對

清言良慰情畱之累月不盡意歸心又欲東南征鴈宕
峰高高不極中有謝公舊游蹟采芝斲苓可長年應在
天南憶天北君臣相悅可謂千載一時

李至剛名銅以字行松江華亭人洪武中舉明經
試禮部郎中出爲河南布政司參議永樂初以
薦擢右通政拜禮部尙書兼左春坊大學士
尙書無詩名其僅存者頗娟秀

趙玃字雲翰祥符人洪武丁卯舉人授兵部主事
遷員外陞浙江右參政命使交趾還擢刑部右

侍郎改工部復改禮部尚書尋改兵部再改刑

部有儉文集

尚書識于忠肅於弱齡可謂具知人之鑒忠肅序其詩云尚書雍容廟堂之暇發爲辭章長篇短什操楮立就有沈雄而典重者有舒徐而優柔者有平衍而沖淡者有光采煥發而豪宕放逸者有清新流麗而慷慨悽惋者變態不一豈區區拘泥聲律摹仿前人於萬一者之可擬哉其稱許未免過情蓋知己之感深矣

陳璉字廷器東莞人洪武中以明經薦爲桂林教

授遷國子助教永樂初知許州改滁州尋以揚州知府攝州事擢四川按察使入為南京通政使掌國子監事終南禮部侍郎有琴軒集

琴軒詩較孫仲衍不及視雪篷聽雨諸君似勝之

胡儼字若思南昌人洪武末會試乙科授華亭教

諭永樂初擢翰林檢討同解縉等直內閣尋遷

國子監祭酒洪熙元年加太子賓客致仕有頤

菴集

長陵靖難之後簡詞臣入贊機務者七人踰年而解大

紳胡若思出續入者王行儉楊宏濟久而王亦出以是
相業盛稱三楊論世者謂解胡王三公才品學術在二
楊之右使其不出發於事業必更有可觀者然揆之以
時度之以勢有所不能也賓客學文於鄉先生熊釗伯
幾伯幾學於虞集伯生故其文有源本詩亦近西江派
吳溥字德潤崇仁人建文庚辰進士授翰林編修
永樂初陞修撰遷國子司業有古崖集

博士聘君尊人詩格楚楚不若聘君之塵腐滿楮也

王景字景彰以字行松陽人洪武壬子領浙江行

省鄉貢進士授懷遠教諭遣戍雲南建文初召
修高廟實錄陞禮部右侍郎兼翰林院侍講充
副總裁官靖難後進學士

靖難師入相傳學士請葬建文君以天子之禮然鍾山
不聞有封穴或請而不允也古風三首其一不無故主
之思因錄之

王達字達善無錫人洪武中舉明經爲大同訓導
薦入官國子助教永樂初擢翰林編修遷侍讀
學士有耐軒天游二橐

耐軒與大紳孟敷汝玉希範號東南五才子其詩太便利不耐咀嚼然如送人人都作起句云鶯啼細雨中一騎發城東又送人從軍作云細雨都門酒東風驛路塵未嘗不矜練也

王璠字汝玉後以字行長洲人洪武中舉浙江鄉試以薦攝府學教授改應天訓導擢翰林五經博士永樂初進檢討再進春坊贊善下詔獄死

洪熙初贈太子賓客諡文靖有青城山人集

翰林四王竝稱而汝玉弟璉汝器璉汝嘉一門又有三

焉其詩不費冥索斤斤唐人之調吳人徐用理集永樂後詩家三百三十人以汝玉壓卷焉

王洪字希範仁和人洪武丁丑進士授行人永樂初擢吏科給事中人翰林爲檢討歷修撰侍講左遷禮部主事有毅齋集

希範詩最爲孟敷所重至不敢與鴈行其對張宗海論詩自誦所作竊比漢魏張哂而未答復曰終不作六朝語張曰子詩傍大李門牆猶未窺其奧也希範始屈服今誦其詩率規仿唐人具體而已品當在孟敷下

王紱字孟端無錫人洪武中就徵坐累戍朔州永樂初以善書薦供事文淵閣拜中書舍人有友石山房橐

錫山自倪元鎮後孟端山水竹石瀟灑出塵筆蹤可繼人品亦未多遜在京邸與一商人鄰居月下聞吹簫聲明日往訪之寫竹以贈曰我聞簫聲用以簫材報其人不解事以紅氍毹爲餽乞再寫一枝爲配孟端大笑取前畫裂之又嘗退朝黔國公從後呼之孟端不應私念曰是必索我畫爾後十年寫尺幅萬里遺焉予嘗見孟

端爲惠山僧畫竹茶壚圖羣賢題咏甚衆今存顧典籍
貞觀山莊當時夏太常景亦善寫竹儲藏家得其十幅
不敵孟端之一也詩亦清疎一如其畫章舍人昞如狀
云永樂初詔求天下文章之士洎善書者各二十八人
登文淵閣公被首薦蓋與吉士竝入直者此國史所未
詳也

錢仲益無錫人永樂初以翰林編修轉周王府長
史有錦樹集

長史詩格爽朗惜遺集罕傳予從秦對巖前輩購得亟

錄其八首猶未盡其蘊也

蘇伯厚名埜以字行建安人洪武中以薦授建寧府學訓導遷晉府伴讀永樂初擢翰林侍書遷檢討以子鎰仕贈吏部員外郎有履素齋集

蘇君傳詩絕少其五言神意閒審綽有魏晉風陳嗣初稱南閩偉奇超卓之士必以蘇先生伯厚爲之首不誣也

張洪字宗海常熟人洪武中謫戍雲南永樂初授行人仁宗召入翰林改修撰有集

張宗海集一冊予在史館曾見之無足采者仍錄古東
門行一首其辭云僕夫顧我悲轅馬踟不行古來離別
地青草不復生居人攀桃李悵望難爲情流塵起阡陌
遠樹花冥冥莫向秦東亭唱此東門行土中有死骨聞
之復心驚

陳繼字嗣初吳縣人經歷汝言子用薦授五經博
士領宏文館事進檢討有怡菴集

嗣初爲惟允遺孤惟允坐法誅家無長物惟閱過書二
萬餘卷其母吳教之成學以薦授五經博士時獻陵於

大內之西思善門闕宏文館命楊學士溥主之嗣初與
王侍講璉入直焉其詩本之家學持論以爲詩者非得
乎天地之清氣則無以極其妙今所存怡菴集一十五
卷詩未之錄嘗見題漁父圖有云夕陽漸紅江轉綠分
明畫出一幅漁村晚景也

陳亢宗名宗以字行永嘉人官兵部員外郎

員外午門觀燈應制詩景陵品居第一然實遜曾襄敏
陳文定諸公送友一律調雖在弱源本隨州

袁珙字廷玉鄞人以相術拜太常寺丞有柳莊集

清言詩話 卷之六 十七
寺丞得相法於別古厓識文皇於潛邸遂遷寺秩然家
本土族其父彥章仕元爲翰林國史檢閱世稱菊村先
生嘗作布衣歌云我家頗讀書初非田舍翁蓋道其實
也寺丞於九流百氏靡不涉究歌詩亦能人格不失菊
村家數

劉薦字士瑞青田人誠意伯基之孫洪武庚午襲
封辛未貶秩丁丑戍甘肅尋赦還永樂中卒于
家有盤谷集

趙周臣自號閒閒居士士瑞亦自號閒閒子其集名盤

谷者士瑞襲爵之後貶秩歸農築室於青田舊宅之西
雞山之下因其地山水盤旋故以名焉詩師吳興沈原
昭

附錄愚山云公侯伯襲封底簿據兵部貼黃薦以洪
武二十三年十月襲爵次年九月卒吾學編諸書並
同攷薦所著盤谷集及括蒼陳谷閒閒先生傳乃知
薦罷官謫戍本末且永樂中尙無恙貼黃載薦以襲
封次年卒諸書因之皆誤也

沐昂字景暉黔寧昭靖王之子以左都督鎮守雲

南卒贈定邊伯諡武襄有素軒集

定邊平麓川之寇威著西南而能以餘暇畱情文詠輯
明初名下士官於滇及謫戍者自邾仲經以下二十一
家詩凡二百五十首目曰滄海遺珠楊東里序之謂當
時選錄諸家劉仔肩 王偁雖精且詳猶未免有遺
惟沐公所擇和平婉麗可玩可傳其賞識若此

曾榮字子啓吉安永豐人永樂甲申賜進士第一

授翰林修撰歷侍講侍讀學士左春坊大學士

進詹事府少詹事卒贈禮部左侍郎諡襄敏有

巢曉集

子啓下筆不休不事推敲偶合繩墨五言如斷雲京口
樹殘月廣陵鐘暝色迎官舫春寒到客衣雨從江北少
山到宿州多殘燭明官舫疎鐘出郡樓寒潮瓜步月殘
雨秣陵舟七言如雲中鸞鳳扶雕輦水底魚龍識翠華
草綠野塘多是水雨晴沙路不成泥平鋪碧甃連馳道
倒瀉銀河入苑牆均不失唐人風格

周述字崇述吉水人永樂甲申賜進士第二授翰

林編修進諭德陞左庶子有東墅集

唐人讌集賦詩每推一人擅場如昇平公主席上李端
擅場送王峻鎮幽朔韓翃擅場劉相巡江淮錢起擅場
他未暇悉數永樂中命翰林賦白象則胡庶子廣第一
賦神龜則王贊善汝玉第一午門觀燈則陳員外宗第
一然員外觀燈之作比之周庶子陳祭酒似遜之實非
擅場也

李時勉名懋以字行江西安福人永樂甲申進士
選庶吉士授刑部主事進侍讀改御史官終國
子祭酒卒諡文毅改諡忠文有古廉集

忠文古之遺直不以詩名而扶風數篇雖未遠擬秋胡
要非拙手可辦予嘗獲公致湯都閫手書楷法遒勁乃
知書亦能品也

陳敬宗字光世慈溪人永樂甲申進士選庶吉士
授刑部主事改翰林侍讀轉南京國子司業陞
祭酒卒贈禮部右侍郎諡文定有澹然居士集
祭酒清德與李忠文竝重號南陳北李詩特雍容溫粹
洵稱盛世之音

王英字時彥金谿人永樂甲申進士選庶吉士歷

翰林修撰侍講再扈駕北征累官南京禮部尚書卒諡文安改文忠有泉坡集

西王密切謹嚴句無浮響如別路斜陽京口樹他鄉明月洞庭船挽得瑯弓射飛虎賜將宮錦繡盤螭舊館空餘秦地月古壇猶似漢宮秋皆琅然清圓可誦也

王直字行儉泰和人永樂甲申進士選庶吉士歷翰林修撰侍讀進學士擢吏部尚書加太子太保進少傅兼太子太師卒贈太保諡文端有抑菴集

菴集

東王不得爰立西楊之力也觀其撰東楊文集序云直
之去翰林惟公深惜之而反爲忌者所病夫士之進退
出處有命焉非人力所能勝奚以病爲哉又題東里翰
墨卷云楊氏與王氏世有連予竊祿翰林從先生者三
十七年教益多矣予之事先先生負恃親愛於凡所當言
者盡言不諱則有之非理而諛語則奚敢後予去翰林
或謂出先生意蓋言語以爲階豈旁觀側聽者固能知
其情邪而予實不自知也釋其辭雖隱而情事躍如矣
特其人長者故爲東里作傳止揚其善已君子哉若人

乎其論詩有云詩者志之所發也方其動於中而形於
言雖各有自然之機然非取法於前人而欲從容中度
不失其正亦難矣覽集中詩未遽出西楊下顧元美元
瑞諸公品隲詩家甚廣獨不及焉何與

章敞字尙文會稽人永樂甲申進士改庶吉士授
刑部主事歷員外郎中改吏部擢南京禮部右
侍郎有質菴集

侍郎兩使南交却金不受以清德聞其詩不費雕鏤間
合集度

周忱字恂如廬陵人永樂甲申進士改庶吉士授
刑部主事轉越府右長史超拜工部右侍郎巡
撫江南陞戶部尙書改工部卒諡文襄有雙崖
集

進士改庶常相傳自永樂甲申始是科命解學士縉選
得二十八人以應列宿文襄自陳年少乞讀中祕書時
人謂之挨宿云攷洪武乙丑有楊靖徐孟昭郭資皆以
庶吉士稱大誥亦載庶吉士廖孟瞻以受賅誅則又在
乙丑之前矣至戊辰年解縉亦爲中書庶吉士益信不

始於永樂初也其後文襄填撫江南凡二十二年以經濟名世詩非所長然性好儲書其藏室詩云羣經旣竝蓄百氏無弃捐所至每充棟來往勞車船嗜學如此宜其吟諷亦未遠遜二十八人也故彭惠安贊云學博而邃沛乎有容二十八宿誰能右公

李昌祺名禎以字行廬陵人永樂甲申進士選庶吉士擢禮部郎中出爲廣西左布政改河南有容膝軒草運籠漫橐

方伯務謝朝華力啓夕秀取材結體頗與段柯古相似

嚴貞字頤正嘉興人永樂甲申進士知景陵縣
頤正詩僅存柳州城樓一首浙音彙編謂官至雲南右
布政使攷雲南舊志布政使題名記有嚴貞係寧波奉
化人乃永樂戊戌進士別是一人也

魏驥字仲房蕭山人永樂乙酉舉人由松江訓導
累官南京禮部尙書致仕卒年九十有八諡文
靖有南齋前後集

文靖仕宦四十年官階二品年近百齡可稱嚮用五福
其文極醇雅詩雖非專長亦頗蘊藉

林環字崇璧莆田人永樂丙戌賜進士第一授翰

林修撰陞侍講有綱齋集

侍講未第之先縱酒自放雖在玉堂詩無臺閣氣

陳全字果之長樂人永樂丙戌賜進士第二授翰

林編修歷侍講署院事有蒙菴集

果之五言專法韋柳

曹閻字冀成江夏人

一云黃巖人

永樂丙戌進士官監

察御史

侍御楚產登科錄可考而謝方石采其詩入赤城集中

期東里一篇情致纏綿髣髴謝監南樓風調

苗衷字秉彝定遠人永樂辛卯賜進士第二累官
兵部侍郎兼翰林院學士入直內閣進尚書贈
少傅諡文康

鴻臚卿大興楊思敬築草亭於東郭自正統丙辰始歲
會文學名流極觴詠之樂自後遂爲都城飲餞之地西
王尚書詩所云柳陰嘶過馬花塢駐行車者也文康亦
有東郭草亭讌集詩其後又於崇文門外十里許據渾
河之支流有地二十頃以二頃爲南園鑿塹環之繚以

重垣中植桃杏諸果雜蒔花卉池種芰荷菱芡退朝邀
諸鉅公燕集其地則東王尙書有序紀之

錢習禮名幹以字行吉水人永樂辛卯進士選庶
吉士除簡討歷侍讀學士陞禮部右侍郎卒諡
文肅有應制集詞垣續稟歸田稟

王元美以錢文肅六典文衡爲明盛事考文肅永樂甲
辰業爲會試同考官宣德丁未入會場分考而正統丙
辰己未兩次殿試皆充讀卷官辛酉復爲順天主考是
主文衡者十次矣其詩雖非作家然亦無塵空氣

陳鎰字有戒吳縣人永樂壬辰進士官至榮祿大夫太子太保都察院左都御史諡僖敏有介菴

集

僖敏開濟之才韻語非其所務湯尙書潛菴稱其文有
組舞磬控之樂顧遺集罕傳予從其裔孫彥瑜所見之
錄詩一首

陳循字德遵泰和人永樂乙未賜進士第一除翰
林修撰累官戶部尙書少保兼太子太傅華蓋
殿大學士英廟復辟戍鐵嶺尋放還有芳洲集

裕陵復辟吳人盛誇徐元玉社稷之功然奪門二字豈
可示天下後世李文達之言當矣予嘗見少保訟寃疏
手彙具陳元玉之譏斯亦纂國史者所當知也少保詩
絕意規摹饒越石清剛之氣

晏鐸字振之富順人永樂戊戌進士改庶吉士授

福建道御史以言事謫上高典史有青雲集

振之采明初詩爲鳴盛集惜未之見花月金陵十四樓
之句盛傳於時或云在宣德十才子之列今其詩存者
甚少格調平平僅與海寧三蘇伯仲按俞憲登科考名

在永樂十六年李騏榜三甲第三十五人何出光蘭臺
法鑒錄稱是永樂十三年進士十五年由庶吉士授福
建道御史巡按兩京畿山東以建言謫上高典史吾鄉
沈孝廉德符野獲編謂是永樂二十二年庶吉士傳聞
異辭當以登科考爲正也黃才伯撰翰林記謂永樂甲
辰科庶吉士不可考題名止書四人其一方復乃壬辰
進士王道方懋德甲辰登科錄竝無其人弇州別集載
六人野獲編云其實二十人然六人之外所增益者如
劉濟張觀乃壬辰榜周安乃乙未榜沈善李敬木訥曾

泉盧璟及鐸乃戊戌榜萬碩王璉乃辛丑榜初疑孝廉
偶誤及閱劉文安所撰劉實傳稱實從周學士功敘學
書經用以舉進士時宣宗皇帝方隆儒術合前科丁未
是科庚戌後科癸丑進士共選得二十八人比列宿數
以先朝選士亦嘗若是也然則合先後數科同選庶吉
士實始於永樂間矣孝廉孰精掌故日讀一寸書考證
極詳是非亦不謬惜其書未刊行於世

薛瑄字德溫河津人永樂辛丑進士除御史歷大
理少卿累進禮部左侍郎兼文淵閣大學士卒

諡文清從祀孔廟有河汾集

文清讀書錄專以宋儒爲師其詩有云吾意六籍外尙
多古人書一朝秦燄烈焚蕩無遺餘掇拾煨燼者補綴
誠區區訛闕固已多盡信寧非愚獨有羣聖心昭哉難
翳如多謝宋諸老萬世開迷塗宜於詩亦宗擊壤矣而
集中五言醇雅有陶孟韋柳之風予嘗謂宋之晦菴明
之敬軒其詩皆不墮宋人理趣未見有礙於講學又何
苦而必師擊壤派也

于謙字廷益錢塘人永樂辛丑進士除山西道御

史擢行在兵部右侍郎罷爲大理寺少卿景陵
踐阼拜兵部尙書加少保英宗復辟棄市成化
中贈太傅諡肅愍後改諡忠肅有集

少保社稷之臣其詩特多秀句如風來疎牖銀燈暗月
轉高城玉漏遲紫塞北連沙漠去黃河西繞郡城流野
花偏向愁中發池草多從夢裏生千里逢人俱是客十
年持節未還家鳥飛不過巖頭石人渴難尋澗底泉風
約閑雲難作雨渠分流水不成河炕頭炙炭燒黃鼠馬
上彎弓射白狼天外青山圍故國雨中黃葉下空潭皆

意態自然不煩雕琢其論詩曰詩豈易言哉發於心形於歌詠盡乎人情物變非深於理而適於趣則未易工也觀其持論造詣深矣

張楷字式之慈谿人永樂甲辰進士授江西道御史出爲陝西僉事轉副使擢都察院右僉都御史有和唐集

中丞和唐不獨律詩踵韻而已至歌行古風并上句亦和之同時餘姚陳贊維誠亦然登黃鶴者必賡崔顥之章夏滕王者必仿子安之體人雖至愚不愚於此矣其

在閩提督軍務除夕作詩云亂離何處覓屠蘇濁酒三
杯也勝無又云除夜不須燒爆竹四山烽火照人紅爲
言者所劾而罷此殆非和韻詩宜其中禍後舍和韻不
復作也

瞿佑字宗吉錢塘人洪武中以薦歷仁和臨安宜
陽訓導升周府右長史永樂間謫戍保安洪熙
乙巳赦還有存齋樂全集香臺百詠

明初詩家以楊廉夫爲祭酒廉夫見同調綴以評語不
曰牛鬼則曰狐精此王常宗論文卽以狐比廉夫也宗

吉幼爲廉夫所賞拾其唾餘演爲流派劉士亨馬浩瀾
輩爭效之譬諸畫仕女者肌體癡肥形神猥俗曾牛鬼
狐精之不若矣其稍有風骨者如射虎何年隨李廣聞
雞中夜舞劉琨蹈海莫追天下士折腰難事里中兒庶
與凌彥翀李宗表相近當時嘗取宋元金三朝律詩一
千二百首編爲鼓吹續音惜乎不得見矣

偶桓字武孟太倉衛人洪武中應秀才舉爲崇安
從事授桂林河泊大使終荆門州吏目有江雨

軒集

明初詩家操選政者賴良直卿許中麗仲孚劉仔肩汝
弼沈巽士傅王傅孟敷皆有所蔽惟瞎牛乾坤清氣一
編能開生面惜予所鈔闕七言近體絕句未得全書恒
以爲憾

謝縉字孔昭吳人有蘭庭集

孔昭畫入能品予嘗見其山水真蹟華亭董尙書稱爲
勝國名流然其詩集刊於永樂中汝南周傳浚儀張肯
序之卷末有送盛啓東還吳詩並寫雲陽早行圖以贈
題云永樂丁酉十月徐用理選其詩入湖海蒼英集不

得謂之元人矣

趙迪字景哲懷安人自號白湖小隱有鳴秋集

景哲五古學唐人而得其丰韻二元遠遜之不知當日何以不列十子之目愚山據二徐氏辯景哲非山人其實不然福州林孝廉佶獲徐興公所藏鈔本鳴秋集有景泰五年迪仲子壯後序中云先人值時多故投老林泉而同時閩人鄭閻公望鄭關公啓郭塵敬夫均有輓鳴秋山人詩則宜陽人官吏部侍郎賦元夕應制詩者自是別一人矣壯懷安人中宣德十年鄉試官南海知

青...言...
縣具載閩省賢書

附錄愚山云俞憲百家詩以迪爲山人徐庸湖海耆
英集載迪元夕應制詩徐泰皇明風雅云宜陽人官
吏部侍郎未詳孰是然景哲非山人明矣

郭廔字敬夫福州人有鏡湖清唱

附錄徐興公云敬夫吾鄉隱君子百年來罕有知者
其題青鋪嶺絕句云家林想在空濛外一帶螺江隱
翠微又有門前湖白與山青分攜空過白湖亭之句
其所居當在白湖螺浦之間與趙景哲相鄰竝也

施敬字孟莊錢塘人謫居滇

孟莊詩頗清越句如斜日黃畱漁浦樹隔江青度海門
山鷓鴣蹋翻黃竹葉翡翠啄破蒼苔花天吳拔斷蛟龍
尾月露洗出珊瑚枝夕陽靄靄衆山暝秋水迢迢雙鷺
明茅苴綠深江路草枇杷黃盡客窗枝均有風致若歸
燕一首疑是感革除而作其辭云已知秋社近更繞畫
梁飛注意豈不念天時難獨違雙歸遼海遠對語夕陽
啼花雨重來日故巢還是非

劉叔讓揚州人

叔讓題正南門城樓云紅樹一村蒲旬晚黃雲滿地
田秋秋夜述懷云南詔羈縻傷短髻東湖寥落憶扁舟
蓋亦明初徙滇者

李孝謙名本以字行鄞人與弟悌謙洪永間相繼
舉孝廉皆以母老固辭有中松集

孝謙悌謙忠謙兄弟三人皆有至行其父仕開饒於貴
時會稽胡舜咨金華戴叔能錢塘楊彥常曹南吳主一
豫章揭伯防先後游四明仕開招致賓館俾諸子問業
故其詩文有法孝謙撰長律英華度有可觀惜其不傳

尤安禮字文度吳縣人建文元年舉於鄉官至貴

州布政司參議

少參爲高士敏方希直所取士樹屏歸田人罕見其面
况太守鍾入覲楊東里詢其起居鍾無以應東里曰公
爲守土吏乃不識尤文度邪鍾歸訪之見一老絡絲巷
中布衣紉屨環堵蕭然鍾欲割官地益宅謝不可遺以
金亦不受鄉人至今傳爲美譚其遺文尙存韻語特少
送人從軍一篇雖乏警句然唐名家作古詩亦有如是
而止者

林枝字昌達閩縣人號古平山人有效輦集

閩自十才子外能詩而不與其列者有趙迪景哲林紹
淳裕鄭文霖汝衆林敏漢孟陳本叔固及昌達也昌達
集不傳徐興公家有老儒手錄明初詩今歸林孝廉估
子借觀錄之

劉績字孟熙紹興山陰人隱居不仕人稱西江先
生有嵩陽集

殘雪未消雙鳳闕新春先入五侯家晚唐張蠩詩也孟
熙易殘以霽易新春以春風攘爲已作遂以此得名人

或少之然竹影橫斜水清淺桂香浮動月黃昏非江爲
詩乎林君復易疎暗二字竟成千古名句所云一字之
師與活剝生吞者有別也張作全詩不稱不若劉之首
尾相當其自題詩本云幼小工刺繡極知鍼綫難祇緣
花樣古不耐俗人看是時人爭學溫李宜其以拔俗爲
嫌耳

按劉孟熙早春寄京師白虛室先生云帝城佳氣接
烟霞草色芊芊紫陌斜霽色未消雙鳳闕春風先入
五侯家歌鐘暗度新豐樹游騎晴驕上苑花獨有楊

雄才思逸應傳麗句滿京華

趙宗文名文以字行長洲人官鄱陽知縣有慎獨

齋集

趙叟傳詩不多率清穩可誦其題金山寺云淮海西來
三百里大江中湧一孤峰凌厲無前惜乎全詩不稱

陳觀字思賢南海人

明洪永間有四陳觀一不知何許人中洪武辛未進士
一中洪武丁丑進士福建永福人一中洪武庚午舉人
字子瀾富陽人一南海人字思賢子瀾初筮爲延平教

授調黃州升國子助教力請補外改武昌教授再調荆
州初充應天同考試官再爲江西福建考官調荊州後
又爲江西福建考官致仕後復起爲應天同考試官掄
文六次居教職五十餘年洵異事也陳少保循志其墓
稱誨諸生之暇輒爲詩文以應四方之求及引年歸日
與故舊賦詠爲樂惜其詩傳者罕矣九日登高一律南
皮李時遠云是南海陳觀之作今從之

吳子恒豐城人寧海縣丞有雪厓詩集

子恒詩一卷其曾孫巡撫雲南都御史祺刊行秀水陶

照華容孫繼芳臨海趙淵零陵楊材皆為之序有弟叔
 潤中永樂丙戌進士仕至浙江按察僉事及卒子恒哭
 以詩云出仕應同歲歸休又共年又云介壽周花甲為
 官歷四朝則其卒在正統間也又有八句自述詩云天
 與遐齡八十秋六旬老矣得歸休蓋歸田廿載後乃沒
 攷之南昌台州二府志皆不載其人詩雖欠工趙淵稱
 其不出位不狎物若老人整巾體貌自別

靜志居詩話卷六